

Riba Dia Nacional di Republica Dominicana

Construccion di busto na honor di Juan Pablo Duarte lo cuminsa oficialmente diasabra awor

Lo tin un presentacion folklorico na Paseo Herencia

ORANJESTAD – Consulado General di Republica Dominicana na Aruba lo inicia dia 25 di februari awor e construccion di un busto na honor di e "patricio", Juan Pablo Duarte Diez.

E inicio di e obra aki ta tuma luga enconexion cu e conmemoracion di e 168 aniversario di e proclamacion di Dia di Independencia di Republica Dominicana cu a sosode riba dia 27 di februari 1844. E actividad enconexion cu e Dia Nacional di Republica Dominicana lo wordo encajesa pa e Consul General Dominicano na Aruba, sra. Joseline Rosario de Rosa, y



Consul General Dominicano na Aruba, sra. Joseline Rosario de Rosa

Ingeniero Luis Sifres, kende ta director di Oficina di Ingenieronan y Supervisornan di Obran di Estado (OISOE). E ceremonia lo conta cu presencia di e figuranan principal di e gobierno di Aruba, entre nan nos Prome Minister sr. Mike Eman y

Gobernador di Aruba, sr. Freddy Refunjol. E ceremonia di inicio di e construccion aki dedica na e figura patriotico Dominicano di Juan Pablo Duarte, ta programa pa 11'or di mainta riba e plaza cu lo ser bautisa cu su nomber di fundado di e nacion Dominicano. E ta situa riba caya Leeuwenhoekstraat y Hospitalstraat, dilanti di Hospital bieu, na Oranjestad. Consul Rosario de Rosa, kende lo ta encarga di e discurso central di e acto aki, a bisa cu e lo resalta e baloman patriotico di e pueblo Dominicano "y loke ta nifica e echo historico cu a duna nan e liber-

tad cu awendia nan ta disfruta di nan. Esaki danki na e luchanan cu tanto hende homber como hende muhe guia dor di nan heroenan patriotico: Juan Pablo Duarte Diez, Matías Ramón Mella y Francisco del Rosario Sánchez. E diplomatico Dominicano, Rosario de Rosa a splica cu e meta di e plasa na honor di Duarte tin di haber cu e interes di e comunidad Dominicano residencia na Aruba lo tin un sitio special pa rindi honor na e memoria di e fundado di e nacion Dominicano. E tereno caminda lo ser construi e monumento aki a ser otorga dor di Gobierno di Aruba riba dia 27

di februari 2011, mientras cu e permiso pa cuminsa cu e construccion di e obra a ser otorga recientemente dia 8 di februari ultimo, segun e Consul Dominicano. "Nos ta hopi emocionada pasobra esaki ta un logro importante pa e republica", asina sra. Rosario de Rosa, a bisa. Igualmente e ta informa cu riba diasabra 25 di februari pa 7'or anochi, Consulado General di Republica Dominicana na Aruba lo organisa un presentacion folklorico y artistico na Plasa Paseo Herencia. Den ambos actividad a ser invita miembronan di e comunidad Dominicano residencia na Aruba. □